

四庫全書

史部

欽定四庫全書

欽定外藩蒙古回部王公表傳卷之一百十三

傳第九十七

原授土默特右翼都統託博克列傳

居歸化城之土默特今改

襲三

等男

託博克土默特人姓博爾濟吉特世居歸化城隸

土默特博碩克圖汗部嗣因察哈爾林丹汗滅土

默特遂為所屬天聰六年大軍征察哈爾託博克

偵林丹汗西遁額請內附九年來朝

優賚之崇德元年授託博克三等叅領隸右翼與都統杭

高協守歸化城三年率子瓦駟來朝授一等輕車

都尉世職瓦駟以佐領授騎都尉五年

詔晉託博克一等叅領

賚弓矢冠服諸物六年

賜貢使圖捫博奇等宴及甲冑冠服順治元年獻駝馬貂

皮三年隨豫親王多鐸擊喀爾喀土謝圖汗及車

臣汗兵于扎濟布喇克四年叙功

詔授右翼都統時杭高子巴桑因軍務獲罪削爵以託博克代六年復隨英親王阿濟格討叛鎮姜瓖於大同屢敗賊衆康熙九年卒

賜謚果壯長子瓦駟以騎都尉兼襲一等輕車都尉

詔加為三等男爵卒弟古嚕及其子拉察布兼襲事具後傳拉察布卒子什第襲什弟卒子達什色稜襲達什色稜卒子納木扎布襲納木扎布卒子甘保襲

舊隸右翼都統不分旗故不別立表傳託博克次  
子古魯襲都統

一次襲古魯託博克次子康熙九年由佐領襲都  
統十三年

詔選兵入邊會勦陝西叛鎮王輔臣十四年正月偕副都  
統席第等率土默特兵七百至榆林聽調

諭獎其聞命速赴三月由榆林迎提督陳福軍於興武營  
會鄂爾多斯部貝勒索諾木亦率兵至五月合圍

花馬池叛賊朱龍糾衆援大軍迎擊之朱龍遁城  
守賊出降花馬池平六月隨大軍復叛井安邊諸  
砦七月進圍定邊撫定下馬關師還駐榆林八月  
由西安援鞏固原十五年正月寧夏兵變

詔古魯等防守靈州定邊等處旋請屯黃河岸扼寇衝

允之三月敗賊衆於靈州六月闕隴平叙軍功以兄瓦駙  
已卒兼襲三等男二十年卒子拉察布襲

二次襲拉察布古魯長子康熙二十年由佐領襲

都統兼三等男二十一年卒以子什第襲三等男  
事具前傳其叔父烏巴什襲都統

三次襲烏巴什託博克第三子康熙二十一年由  
佐領襲都統二十八年備兵防噶爾丹二十九年  
運殺虎口倉粟濟都統額赫訥軍三十五年副都  
統多爾濟等隨西路大將軍費揚古進擊噶爾丹  
命安郡王瑪爾渾統土默特兵防歸化城噶爾丹既敗遁  
瑪爾渾移駐愛畢哈錫喇穆稜界留兵所部以烏

巴什子副都統阿弼達領之是年烏巴什卒阿弼達襲都統

四次襲阿弼達烏巴什長子康熙三十五年由副都統襲都統三十六年以不訓練士卒罪削職詳左翼都統阿喇納傳左翼仍以阿喇納兄子古睦德代之越八年卒子丹津襲右翼都統停襲改用京員扎喇克圖俄赫楚宗相繼代雍正元年

諭曰歸化城土默特兩旗原在四十九扎薩克內其都統



副都統等官皆係本部初附功臣子孫世職前因廢弛軍務革退都統另選京員管轄今舊習漸改訓練兵弁行伍整齊凡行圍出征等事與內地弁兵一體効力不負

聖祖仁皇帝教育生成之意宜復舊制以阿弼達之子副都統根敦襲補右翼都統其副都統缺仍令丹津將兩翼內應補人員與原任都統副都統世家子孫內保送擢用

五次襲根敦阿弼達長子初授副都統康熙五十九年授叅贊大臣隨振武將軍傅爾丹由阿爾台進勦策妄阿喇布坦至格爾額爾格擒宰桑貝坤等百餘人復焚其糧於烏蘭呼濟爾

優賚之雍正元年襲都統二年

詔率滿洲兵二千赴巴里坤防禦青海叛賊羅卜藏丹津  
尋分兵千駐吐魯番境師旋入

覲

賜孔雀翎及

御書福字白金等物九年三月大軍議勦噶爾丹策凌根  
敦率土默特兵千赴涼州聽調七月會西路軍於  
巴里坤偵噶爾丹策凌遣兵由伊犁犯北路軍於  
和通呼爾哈諾爾根敦隨西路大將軍岳鍾琪為  
搗巢計襲擊烏嚕木齊大敗之追至額爾穆克河  
而還十月

諭曰土默特將弁兵丁連歲從征甚屬勤勞已命頒帑賞

賚至都統根敦向在阿爾台軍營効力十有餘年今復至巴里坤懋著勞績朕甚嘉之特賞御用冠服及銀二百兩以示獎勵十年隨副將軍常賚等率兵三千餘赴哈密援剿十三年撤兵由塔勒納沁入嘉峪關還軍歸化城是年

詔偕丹津協里屯田事乾隆元年叙功

賚幣四年來朝七年卒子班達爾什襲

六次襲班達爾什根敦長子雍正七年隨大將軍

傅爾丹駐防北路軍營乾隆七年由叅領襲都統  
尋來朝

賜孔雀翎

蹕五臺山以校射獲

優賚十九年卒

詔停襲右翼都統改三等男子賽音弼里克圖襲

七次襲賽音弼里克圖班達爾什長子乾隆二十

年

諭曰歸化城右翼都統原係國初土默特杭高所遺世  
職後改授託博克嗣因子孫不勝其任由京員補授  
四次復念仍有可用之人是以令根敦及子班達爾  
什復授是職朕思都統有整飭軍伍之責非閑散世  
職可比班達爾什之子賽音弼里克圖係前鋒職今  
若驟授都統不惟恐弗勝任且旗內台吉大員甚多  
亦恐未必服其調度著將班達爾什所遺都統職另  
簡京員補授其本支內加恩改授三等男爵令賽音

弼里克圖承襲是年入

覲

獎堪造就授左翼副都統令勉自効副篤念世職意二十五年以病罷二十六年卒無嗣從弟賽音岳蘇

圖襲

八次襲賽音岳蘇圖賽音弼里克圖從弟乾隆二十六年襲三等男

欽定外藩蒙古回部王公表傳卷之一百十三

欽定四庫全書

欽定外藩蒙古回部王公表傳卷之一百十四

傳第九十八

和碩特固山貝子納噶察列傳

居察哈爾之和碩特今襲輔國公

納噶察和碩特人姓博爾濟吉特元太祖弟哈布圖哈薩爾之二十五世孫其高祖達延曾祖袞楚克相繼為唐古特汗袞楚克子二長拉藏嗣稱汗準噶爾戕之次旺扎爾拉藏子三長噶爾丹丹忠



次索爾扎次色布騰噶爾丹丹忠子班珠爾以叛  
誅索爾扎子四長即納噶察次達克巴次巴勒濟  
見後傳次烏勒木濟為協理二等台吉色布騰別  
授輔國公旺扎爾子曰貢額爾赫貢額爾赫子曰  
特默齊別授扎薩克一等台吉各有傳初準噶爾  
台吉策妄阿喇布坦遣將大策凌敦多卜襲唐古  
特索爾扎被掠羈伊犁噶爾丹策凌嗣給戶十養  
之詭稱送歸唐古特卒不遣索爾扎齎恨死詳西

藏部傳噶爾丹策凌子策妄多爾濟納木扎勒懼  
納噶察竄唐古特禁之大策凌敦多卜孫達瓦齊  
與輝特台吉阿睦爾撒納及納噶察從兄班珠爾  
暱班珠爾母博托洛克為策妄阿喇布坦女初適  
噶爾丹丹忠生班珠爾尋復孕未產策妄阿喇布  
坦誘殺噶爾丹丹忠以博托洛克給偉徵和碩齊  
生子即阿睦爾撒納偕班珠爾助達瓦齊為逆達  
瓦齊釋納噶察尋納噶察從阿睦爾撒納班珠爾

並竄牧額爾齊斯誘哈薩克兵掠準噶爾境達瓦  
齊數蹙之乃為內附計乾隆十九年偕阿睦爾撒  
納班珠爾請降屯牧喀爾喀汎入

覲熱河

賜宴

詔封輔國公時議征達瓦齊

遣納噶察歸牧聽命詭稱願返青海

諭俟達瓦齊亂定歸青海與留準噶爾惟所便納噶察

抵牧易辭告班珠爾稱奉

詔令和碩特族歸青海二十年將從大軍征達瓦齊

諭定北將軍班第詰其情納噶察復易辭稱奉

詔令由巴里坤徙牧班第責不符

旨納噶察慚謝

上以其譎而喜事

詔班第密察之復

諭曰納噶察徙牧青海志果誠情尚可憫俟事定後具

奏請旨非必不可行事也大軍既抵伊犁納噶察德  
阿睦爾撒納私使哈薩克稱自統蒙古漢兵屯伊  
犁喀爾喀貝勒車布登扎布時從軍責之曰爾  
奉

天子命反若自統軍至可乎納噶察復依違其辭班第  
斥不可以侍衛順德訥攜阿睦爾撒納使往阿睦  
爾撒納覲為準噶爾琿台吉納噶察遣宰桑錫哈  
瑪私賂伊犁喇嘛等曰若阿睦爾撒納統準噶爾

必善育爾等復偕新降諸宰桑附巴噶斯約蘇圖  
烏克圖等就阿睦爾撒納密語竟夜班第促阿睦  
爾撒納入

覲以喀爾喀親王額璘沁多爾濟監之就道詭遣納噶  
察歸語班第曰阿巴噶斯偕伊犁喇嘛等言若不  
令阿睦爾撒納統準噶爾衆寧剖腹死班第斥之  
納噶察懼告阿睦爾撒納謀為免罪計阿睦爾撒  
納叛遁

詔額璘沁多爾濟携納噶察來將論罪以其屬給輝特  
台吉之不附逆者納噶察至傾阿睦爾撒納及班  
珠爾逆謀

上以納噶察雖陰比無顯狀且不匿逆謀

詔宥罪歸其屬仍留輔國公爵先是杜爾伯特台吉伯  
什阿噶什烏什伯克霍集斯等聞大軍定伊犁率  
屬降仍舊處其境至是定西將軍策楞統大兵勦  
阿睦爾撒納納噶察請從軍贖罪

詔賫敕往諭伯什阿噶什霍集斯等助擒逆而伯什阿  
噶什以哈薩克掠其牧他徙納噶察將赴阿克蘇  
有扈魯瑪台吉諾海奇齊克者自伊犁至以阿睦  
爾撒納竄博囉塔拉告

諭納噶察曰爾其速赴巴里坤軍偵阿睦爾撒納竄跡  
或尚未至伊犁而策楞已勦逆黨阿巴噶斯等牧大  
軍自可直抵伊犁截賊竄路爾即不必赴阿克蘇就  
近至策楞軍所協理軍務若策楞雖勦阿巴噶斯等



牧而阿睦爾撒納已據伊犁爾即仍遵前旨馳赴阿克蘇境二十一年叅贊大臣兆惠偵阿睦爾撒納據伊犁授納噶察兵三百遣赴阿克蘇檄勿附逆納噶察就道阿睦爾撒納為大軍所迫竄哈薩克

諭納噶察勿赴以効奔走績

詔晉封固山貝子未幾卒無嗣弟達克巴降襲輔國公一次襲達克巴納噶察弟乾隆十九年授二等台吉二十年入

覲授扎薩克時班珠爾以附阿睦爾撒納叛論誅

詔達克巴及弟巴勒濟免坐俟準噶爾定遣歸舊牧二

十一年襲輔國公尋卒無嗣弟巴勒濟襲

二次襲巴勒濟達克巴弟乾隆十九年授二等台

吉二十年授扎薩克二十一年襲輔國公尋請徙

歸青海

諭久處準噶爾習水土若徙至青海非所宜二十二年  
以同牧之輝特台吉車卜登多爾濟等叛誅

詔巴勒濟族徙牧察哈爾四十八年

詔世襲罔替

和碩特輔國公色布騰列傳

居察哈爾之和碩特

色布騰和碩特人姓博爾濟吉特貝子納噶察從祖父拉藏汗見納噶察傳初準噶爾以兵襲唐古特色布騰甫五齡被掠比長羈伊犁達瓦齊篡色布騰謀棄之內附不獲間乾隆二十年大軍征達瓦齊時達瓦齊與哈薩克構兵遣色布騰偕庫本

諾音台吉諾爾布屯特里木哈達防哈薩克以宰  
桑鼐塔特監之定北將軍班第等將抵伊犁遣侍  
衛鼐庫訥檄招色布騰與諾爾布謀殺宰桑鼐塔  
特馳請降

頒賜貂冠朝珠尋入

覲熱河

賚白金千五百

詔封輔國公

遣屯牧喀爾喀汛二十二年徙牧察哈爾四十八年

詔世襲罔替四十九年卒子達什喇布坦襲

一次襲達什喇布坦色布騰長子乾隆四十九年

襲輔國公

和碩特扎薩克一等台吉特默齊列傳

居察哈爾  
之和碩特

特默齊和碩特人姓博爾濟吉特貝子納噶察從

子父貢額爾赫為唐古特汗達延孫見納噶察傳

初準噶爾以兵襲唐古特貢額爾赫被掠特默齊

生準噶爾地仍稱和碩特台吉從子班珠爾與聚  
處乾隆十九年以避達瓦齊亂偕班珠爾來降屯  
牧喀爾喀汛從叅贊大臣努三勦烏梁海抵喀喇  
莽柰領宰桑赤倫及四得木齊屬居吹地往擒之  
復由索勒畢嶺馳赴布拉罕察罕托輝擒準噶爾  
宰桑庫克辛禡木特通瑪木特及扎哈沁包沁噶勒  
雜特兵百五十餘乃還

詔授三等台吉二十年從征達瓦齊隸北路哨探隊抵

額爾齊斯導額琳哈畢爾噶宰桑阿巴噶斯哈丹  
烏勒木濟等降伊犁定入

覲熱河

詔授扎克一等台吉

賚白金千

賜孔雀翎時班珠爾以附阿睦爾撒納叛論誅

諭曰班珠爾同族台吉特默齊及敦多克達什唐拉扎卜

等俱不必辦理仍令照舊雇游牧二十二年徙牧察

牧察哈爾四十八年

詔世襲罔替



欽定外藩蒙古回部王公表傳卷之一百十四

欽定四庫全書

欽定外藩蒙古回部王公表傳卷之一百十五

傳第九十九

厄魯特輔國公巴桑列傳

居黑龍江之厄魯特

巴桑厄魯特人初隸準噶爾以姓稱伊克明安台  
吉乾隆二十年大軍征達瓦齊抵伊犁巴桑降獻  
籍三百餘戶定北將軍班第以

聞

詔賜冠服佩飾入

覲熱河

賜宴

詔封輔國公

賚白金千五百時阿睦爾撒納叛輝特諸台吉不附逆  
者議置塔密爾牧

詔巴桑往會二十二年輝特族叛巴桑及同牧之台吉  
阿卜達什克什克特等不從携馬至科布多汎以

情告

上以其非輝特族且無叛跡

命署定邊右副將軍車布登扎布徙黑龍江以管旗章

京端多卜護之往給糗傳克什克特未就道疾卒

巴桑及阿卜達什屬凡五十三人將軍綽爾多議

置之呼倫貝爾二十六年巴桑卒子色稜德濟特

襲

一次襲色稜德濟特巴桑長子乾隆二十六年襲

輔國公四十八年

詔世襲罔替

厄魯特扎薩克一等台吉阿卜達什列傳

居黑龍江之厄

魯特

阿卜達什厄魯特人姓伊克明安初隸準噶爾稱  
克爾努特台吉以達瓦齊篡虐謀內附從輝特台  
吉阿爾撒納行中道馬疲為噶勒雜特特宰桑哈  
薩克錫喇屬所掠不獲至留牧扎哈沁乾隆十九

年大軍擊扎哈沁獲阿卜達什收畜產阿卜達什  
以情告定邊左副將軍班第疏

聞

詔安置塔密爾附阿睦爾撒納牧

諭賞糧幣歸畜產授扎薩克一等台吉時議征達瓦齊  
請從軍

允之二十年

賚白金五百為裝資從大軍次察罕呼濟爾阿卜達什

以兵三百馳赴額密爾為哨探前隊伊犁定偕新  
降台吉等入

覲熱河

賜宴

賚白金五百

詔歸塔密爾牧有察袞德濟特者伊克明安族也率屬  
降

詔以阿卜達什等轄其屬而察袞等附阿睦爾撒納叛

明年察袞就擒德濟特從阿睦爾撒納竄

詔籍其屬給阿卜達什二十二年徙呼倫貝爾二十六年卒子德勒格爾襲

一次襲德勒格爾阿卜達什長子乾隆二十六年襲扎薩克一等台吉四十六年卒子鄂齊爾襲二次襲鄂齊爾德勒格爾長子乾隆四十八年襲扎薩克一等台吉是年

詔世襲罔替



扎哈沁三等信勇公禡木特列傳

居科布多之扎哈沁

禡木特厄魯特人號庫克辛初為準噶爾之扎哈沁宰桑扎哈沁譯言汎卒也以宰桑領之禡木特守阿爾台汎游牧布拉罕察罕托輝其東為喀爾喀有烏梁海界之其西為準噶爾有包沁及噶勒雜特塔本集賽界之烏梁海凡數種業打牲分隸喀爾喀及準噶爾包沁為回族準噶爾呼礮曰包以回人司礮故名之噶勒雜特塔本集賽皆準噶

爾鄂拓克也雍正八年我大軍屯阿爾台及巴里  
坤路禡木特奉其台吉噶爾丹策凌令以兵二萬  
至汛偵不備掠駝馬總兵樊廷等奮擊之轉戰七  
晝夜禡木特敗歸乾隆十一年台吉策妄多爾濟  
納木扎勒遣禡木特奏請赴藏煎茶明年準噶爾  
以三百人至藏禡木特護之行嗣喇嘛達爾扎襲  
台吉以達瓦齊異志擊之檄禡木特禦諸阿爾台  
境達瓦齊篡召禡木特慰之禡木特以噶爾丹策

凌嗣絕強應命達瓦齊質其子十八年杜爾伯特  
台吉車凌等棄準噶爾來降達瓦齊遣禡木特追  
之由博爾濟河入喀爾喀汎復逸出

上以汎如門戶然何得任準噶爾出入

諭責駐防烏里雅蘇台副都統達青阿罪明年春達青  
阿奏誘擒禡木特及從者三十五人

諭曰禡木特倘召之不至或至而心懷不服則擒之可  
今遣使往輒至不明懲其罪反誘擒不可

詔宥罪遣歸給冠服禡木特械至鄂倫瑚都克汎侍郎

玉保宣

諭釋之謝罪歸時輝特台吉阿睦爾撒納與達瓦齊隙  
達瓦齊檄禡木特數擊之阿睦爾撒納感為內降  
計禡木特以厄魯特及烏梁海兵八千追掠其衆  
阿睦爾撒納間道至請從大軍擊扎哈沁索所掠  
內大臣薩拉爾以禡木特游牧近將擊之而庫列  
圖嶺當其前雪盛不可行將由索勒畢嶺進遣諜

往禡木特既釋歸

上以烏梁海及扎哈沁近內汛

詔薩拉爾逐之阿爾台外不從當以兵討禡木特感不  
殺

恩且念達瓦齊不足事陰有歸志懼誅其子不果有準  
噶爾宰桑別號通禡木特游牧諾海克卜特爾近  
索勒畢嶺為布拉罕察罕托輝下游禡木特赴其  
牧將掠通禡木特為請降計通禡木特覺誘執之

薩拉爾謀得狀由烏蘭山陰以兵驟至通禡木特就擒索得禡木特責負

恩罪禡木特陳前情請徙牧內屬遣扎哈沁得木齊等招所部六百餘戶降薩拉爾檻禡木特至軍

詔釋之禡木特前為準噶爾使已出痘至是入

覲京師

上鑒歸志誠授內大臣職

賜冠服二十年

詔與朝正會宴以通禡木特卒

諭禡木特善視其戚屬時議征達瓦齊

詔阿睦爾撒納為定邊左副將軍領北路哨探兵以禡

木特叅贊

遣赴軍禡木特密奏曰阿睦爾撒納豺狼也雖降不可

命往往必為殃

上以不逆詐諭之阿睦爾撒納亦告我叅贊大臣固倫額駙色布騰巴爾珠爾曰禡木特非傾心降者不

可信今哨探兵以扎哈沁從恐漏師不如令後隊  
色布騰巴爾珠爾以

聞

諭曰禡木特老成習事故令之先行若停其前往是滋  
疑也阿睦爾撒納以禡木特掠其屬與之隙故不願  
同往朕用人期益事豈以他人言為從違乎

詔定北將軍班第飭勿相忌班第請徙扎哈沁衆於扎  
布堪庫克嶺諸地防乘間竄



詔置之齊拉罕勿內徙滋疑授禡木特總管以厄魯特  
喀喇巴圖魯阿玉錫為翼領包沁宰桑阿克珠勒  
尋率衆降察獲禡木特族屬給之初準噶爾定扎  
哈沁包沁納賦例比年獻脯間年供牲贍喇嘛遇  
軍事令助

詔如舊例恤免期年賦授阿克珠勒為包沁總管以禡  
木特兼領之阿睦爾撒納不俟禡木特還先行以扎  
哈沁兵三百從禡木特返牧偕班第議編旗隊以

阿勒巴齊唐古特舊司牧哈沁九得秦務請視佐  
領加一等復以三等待衛奇徹布及扎哈沁得木  
齊阿巴策凌等協理包沁牧務尋馳赴哨探軍有  
賽音伯勒克者乞降巴顏珠爾克汎訊為禡木特  
族且孥聚扎哈沁班第給視牧者阿睦爾撒納遺  
書請給扎哈沁牧所獲輝特戶五十餘班第以非  
其戚屬不之給禡木特與阿睦爾撒納會軍於額爾  
德里克阿睦爾撒納約以兵千待察罕呼濟爾令禡

木特繼進禡木特至察罕呼濟爾阿睦爾撒納已  
赴額密爾引兵八百馳會抵塔本集賽偵杜爾伯  
特叛賊巴朗竄徙選兵三百追之巴朗尋就擒軍  
抵伊犁

詔晉禡木特三等公爵

賜信勇號

賞雙眼孔雀翎四團龍服

命常服之達瓦齊既擒阿睦爾撒納覲準噶爾琿台吉

漸驕縱班第劾之禡木特私語其屬或以告阿睦爾撒納阿睦爾撒納夙與怨聞之愈憾先是

諭班第俟伊犁定偕禡木特議準噶爾善後事至是班第以禡木特兼管扎哈沁包沁牧請仍置阿爾台增喀爾喀藩籬

允之尋撤大軍還扎哈沁兵三百遣歸牧禡木特以疾留伊犁聞阿睦爾撒納驟叛阿克珠勒附之將脫歸乏兵衛為逆黨哈丹等所遮脅之降不從擒赴

阿睦爾撒納所阿睦爾撒納慰之曰準噶爾與

天朝疆域殊爾欲內向何也不如歸我當善視爾馮木  
特唾而言曰天下豈有無君之國哉達瓦齊篡而  
虐

聖天子討其罪噶爾丹策凌嗣已絕我不內歸將焉往  
且

天朝已擒我不即誅復釋還此所謂生死而肉骨也何  
忍背之爾先我往

聖天子待爾厚爾乃謀逆今既擒我我何懼死則死耳  
大軍至將磔汝犬猶不食汝肉阿睦爾撒納慙縊  
殺之禡木特孫扎木禪留扎哈沁牧

上聞阿睦爾撒納叛

詔扎木禪率扎哈沁兵赴大軍且遣屬間道至伊犁告  
班第及禡木特未行間禡木特屬訥默庫自伊犁  
脫歸以禡木特將由闐勒奇嶺來會大軍告定北  
將軍哈達哈遣兵由哈卜塔克拜達克迎之扎木

禪至語之故感且泣請從軍往哈達哈給駝馬令其屬識塗者齎

諭準噶爾敕先行扎木禪繼之以道梗返

諭禡木特妻曰爾其安處牧所勿過慮爾夫禡木特為準噶爾舊人熟習厄魯特情諒不至圍困今大兵將進發爾夫禡木特聞之自必以身來迎或有不虞朕必令爾孫扎木禪襲爵復

諭扎木禪善慰其祖母志哈達哈不時存恤給食物明

年二月定西將軍策楞謀阿睦爾撒納戕禡木特  
以告

諭曰禡木特年就邁効力行間甚為奮勉今逆賊戕之  
深可憫惻其孫扎木禪著令襲公爵大軍定伊犁械  
逆黨至訊得禡木特就死狀

御製詩憫之褒為烈士且有千載流聲芳之句

一次襲扎木禪禡木特孫乾隆二十一年二月襲  
三等信勇公三月以阿睦爾撒納煽烏梁海梗赴



哈薩克道

詔從北路定邊左副將軍哈達哈勦烏梁海叛賊七月  
諭曰輝特杜爾伯特人等朕降旨令歸舊牧扎哈沁亦  
應一體辦理但扎木禪現赴軍所著暫停徙俟大兵  
凱旋時哈達哈傳諭扎木禪令率屬徙歸舊牧安居  
樂業以副朕軫恤意九月

諭嘉其奮勉効力授內大臣十一月哈達哈奏扎木禪  
固請挈屬內徙因

賜牧哲爾格西喇呼魯蘇

諭曰扎哈沁既與喀爾喀鄰牧著即設哨附近卡倫視  
喀爾喀例支領錢糧以資養贍有噶勒雜特得木齊  
丹畢根敦者携戶二百餘內附隸扎哈沁牧二十  
二年署定邊左副將軍車布登扎布以扎木禪辭告  
噶勒雜特附牧雖謐不如別置善從之二十三年  
入

覲扈

蹕行圍得

優賚二十四年從叅贊大臣齊努琿追勦嗎哈沁至阿爾齊圖以兵先遇賊哈喇呼喇山奮擊之悉就擒奪所盜馬九十餘

獎賚幣二十五年扎木禪子捫圖什扈

蹕行圍乞喀爾喀親王成袞扎布代請駝馬勿官給

上以扎哈沁甫定牧乏生計

諭仍官給二十六年理藩院議禡木特歸誠後扎哈沁

屬相繼附置佐領九得二千餘口雖補授總管未給印請以總管扎哈沁一旗印給扎木禪轄其衆  
詔允之四十年卒子捫圖什襲

二次襲捫圖什扎木禪長子乾隆四十年襲三等  
信勇公四十九年卒子託克多巴圖襲

三次襲託克多巴圖捫圖什長子乾隆四十九年  
襲三等信勇公

欽定外藩蒙古回部王公表傳卷之一百十五

欽定四庫全書

欽定外藩蒙古回部王公表傳卷之一百十六

傳第一百

郡王品級多羅貝勒霍集斯列傳

居京師之回爵

霍集斯烏什人父阿濟斯和卓為吐魯番頭目準噶爾酋徙喀喇沙爾復自喀喇沙爾徙烏什因名烏什曰圖爾璦圖爾璦與吐魯番音近其屬邑多以吐魯番邑名之阿濟斯和卓死莫阿克蘇霍集

斯嗣居烏什號圖爾璦阿奇木伯克其兄曰阿卜都伯克弟曰阿卜都里木居阿克蘇乾隆二十年大軍征準噶爾抵伊犁達瓦齊由格登竄踰庫魯克嶺定北將軍班第遣使分道索霍集斯設哨諸嶺隘偵達瓦齊將赴喀什噶爾伏兵待遣弟攜酒及馬給迎達瓦齊至伏發從者七十餘悉就擒馳遣告以兵二百監之行遇大軍往取者於穆素爾嶺以獻將自伊犁入

覲阿卜都伯克告葉爾羌喀什噶爾將偕色沁希卜察  
克衆襲庫車阿克蘇賽里木多倫諸回城請遣舊  
和卓子歸舊和卓曰阿哈瑪特為派罕帕爾裔世  
居葉爾羌喀什噶爾轄回族準噶爾誘執之禁諸  
阿巴噶斯齎恨死子二長布拉呢敦次霍集占仍  
羈阿巴噶斯大軍至乃釋之定北將軍班第遵

旨遣霍集斯偕布拉呢敦歸撫葉爾羌諸城而霍集斯  
私謁副將軍阿睦爾撒納請俟葉爾羌喀什噶爾



就撫以已為回部長班第密疏劾之

諭曰此但因阿睦爾撒納為將軍且恐其總統準部耳  
勿過慮尋阿睦爾撒納叛

詔遣和碩特輔國公納噶察等齎

敕赴阿克蘇宣

諭霍集斯及阿卜都伯克等曰爾原係吐魯番舊屬今  
年春大軍平定伊犁達瓦齊逃往爾游牧爾能擒獲  
及其眷屬解赴軍前將軍大臣等奏報朕已加恩賞

賚又定於明年入覲再沛殊恩今逆賊阿睦爾撒納  
妄思并吞諸部畏罪潛逃朕已命將窮追爾雖不必  
派兵協剿但須預飭游牧伺察防守若阿睦爾撒納  
逃竄至爾游牧時擒獲解送朕必重加爵賞二十一  
年布拉呢敦弟霍集占自伊犁集兵敗阿睦爾撒  
納

詔納噶察勿赴阿克蘇布拉呢敦霍集占尋據葉爾羌  
喀什噶爾叛自稱大小和卓二十三年春大軍往

討

詔靖逆將軍雅爾哈善偵霍集斯若仍居圖爾璦傳示之曰爾等從前將達瓦齊擒獻係有功之人

皇上即施恩賞賚尚欲陸續加恩因辦理厄魯特等無暇今厄魯特等俱已平定領兵前來專為問兩和卓罪與爾等無涉爾等惟誠心効順自必永承

恩澤雅爾哈善奏霍集斯仍居圖爾璦

上以大兵抵其城霍集斯必歸誠

諭之先是布拉呢敦自伊犁歸善霍集斯及阿卜都伯  
克倚任之霍集占萌逆謀懼霍集斯族強或圖已  
析其昆弟子姪居各城以霍集斯為和闐伯克其  
長子漢咱帕爾為烏什伯克以阿卜都伯克為葉  
爾羌伯克其子阿布薩塔爾為阿克蘇伯克行兵  
則携以從霍集斯畏威強附之至是大軍圍庫車  
霍集占往援入其城令霍集斯等駐阿克蘇以待  
不數旬棄庫車走阿克蘇將徙衆赴烏什阿克蘇

閉城拒乃令霍集斯及阿布薩塔爾等脅城外數  
百戶走烏什霍集斯陰約烏什諸頭目欲延霍集  
占入飲縛之霍集占疑詐霍集斯請自召烏什衆  
徒喀什噶爾甫入城以兵拒霍集占懼逃大軍克  
庫車定邊將軍兆惠代雅爾哈善抵阿克蘇偵霍  
集斯及子漠咱帕爾居烏什馳檄招降軍繼進抵  
哲爾格哲克德霍集斯遣次子呼岱巴爾氏獻降  
書翌日抵烏什霍集斯迎謁納戶籍五千口二萬

餘兆惠慰諭之詰進兵道霍集斯曰烏什赴喀什噶爾徑險且霍集占必由葉爾羌遁溫都斯坦喀喇土伯特巴達克山諸部即竄喀什噶爾而布魯特安集延與之仇必不敢經其地大軍往取葉爾羌擒之易兆惠偕諸將定議赴葉爾羌霍集斯請從軍以子漢咱帕爾入

覲遣從弟額敏都霍什提卜齎檄赴葉爾羌招降其兄阿卜都伯克

詔封公品級

賜雙眼孔雀翎紅寶石頂裘服佩飾諸物

諭曰霍集斯有擒獻達瓦齊之功今又歸誠畫策深為嘉悅若能擒獲霍集占必晉加爵賞至從賊人內有霍集斯之兄姪此時若自投來歸應加恩賞即或後時降附亦為寬貸而霍集占以霍集斯內附禁阿卜都伯克父子及其戚族揚稱霍集斯雖降已為戮上聞之

諭曰霍集占以伯克霍集斯被殺飾詞惑衆自應明白  
曉示或令回衆目睹至霍集占將阿卜都伯克等拘  
禁可見霍集斯從前附降之心甚誠着兆惠傳旨撫  
慰仍加恩賞緞六端軍營一切事宜向伊商辦以收  
其用大軍抵葉爾羌霍集斯告曰賊建臺各城隅望  
我軍至輒施礮過臺及城皆坎地設伏當謹備之  
以故我攻城兵無少損霍集斯復厲從卒擊賊  
諭曰霍集斯甫經歸順即率屬奮勉殊可嘉尚著加恩



封固山貝子品級復以其族阿里木摩羅和卓等擊賊被傷

獎賜翎頂既而逆賊抗大軍於喀喇烏蘇霍集斯等固拒之賊不敢逼我壘

詔晉封固山貝子加貝勒品級

賜四團龍服時叅贊大臣舒赫德自阿克蘇以兵赴援道遇降者托克托默特詰為霍集斯弟阿卜都里木屬告霍集占乞和軍門兆惠等不之允

諭嘉之以霍集斯與軍謀

詔並賜

御用佩飾有薩拉阿琿者居葉爾羌其弟穆遜阿琿居  
烏什霍集占遣賊黨阿卜都克勒木由阿克蘇達  
書穆遜阿琿為我軍擒呼岱巴爾氏禁穆遜阿琿  
戚屬告烏什衆勿驚懼

諭曰呼岱巴爾氏之父霍集斯効力軍營伊復通曉事  
體深用嘉悅著加恩授為內大臣賞戴孔雀翎會漠

咱帕爾至

召覲於

乾清宮

賜公品級

賚冠服二十四年

詔預朝正宴

賜觀上元燈

賚漢咱帕爾及從至伯克墨特鄂對色里木達爾漢

伯克額穆魯勒等銀幣有差遣歸烏什復以霍集  
斯妻偕子呼岱巴爾氏輸馬四十助援喀喇烏蘇  
軍

諭嘉之大軍破喀喇烏蘇圍還阿克蘇霍集斯請赴烏  
什集馬

詔酌賚兆惠導

旨詢由烏什進兵喀什噶爾道告曰烏什距喀什噶爾  
近然道多石且乏水泉不若由阿克蘇時賊急圍

和闐城副都統巴圖濟爾噶勒定邊右副將軍富德後先以兵援霍集斯自烏什馳會之和闐圍解上以霍集斯舊轄其地

詔授總管和闐六城阿奇木伯克富德復導

旨詢由和闐進兵葉爾羌道霍集斯告曰伊犁齊達呼

爾瑞取水艱甚丕雅勒瑪至固瑞雖有水草而塞

爾勒克楚魯克通阿里克諸站多沙磧馬行易疲

且距溫都斯坦道遠賊乘間竄不及禦請由丕雅

勒瑪迤南行水草足且便休馬富德議如言霍集  
斯請以和闐六城伯克阿什默特巴喇特等從遣  
赴喀什喀爾招降布拉呢敦懼事不效或累已富  
德以

聞

諭曰霍集斯感激朕恩招降以離賊黨深可嘉悅著加  
恩賞給緞疋至伊翰誠効策果如所算自必加恩萬  
一布拉呢敦執迷不悟於霍集斯何與時額敏都霍

什提卜等私以霍集斯招降阿卜都伯克故告霍  
集占霍集占戕阿卜都伯克阿卜都里木等且知  
大軍將至偕布拉呢敦棄城竄霍集斯從富德軍  
由葉爾羌尾擊之敗諸阿爾楚爾賊遁伊西洱庫  
爾官軍分隊擊霍集斯偕阿克蘇伯克鄂對等執  
燾呼曰降者生否則必死其屬阿里木立燾前中  
賊銃死霍集斯呼愈壯回衆聞聲趨至乞降者萬  
餘霍集占等以兵阻不得遁巴達克山

諭曰伯克霍集斯之兄弟諸子多為霍集占戕害深可憫惻伊此次亦屬奮勉著加恩晉封多羅貝勒

賜恤阿里木及從霍集斯弁兵等銀幣時巴達克山伯克素勒坦沙不即以布拉呢敦等獻其鄰部曰博羅爾居巴達克山東曰幹罕居巴達克山北霍集斯遣托羅斯遷伯克伊斯邁拉和卓招降博羅爾復自以哨探兵偕副都統伊柱屯幹罕博羅爾伯克沙瑚沙默特幹罕伯克密爾莽蘇爾遣使告



曰巴達克山若不獻逆當助討巴達克山悔罪戮  
逆獻霍集斯乃自斡罕還軍

諭曰霍集斯自進兵以來竭盡所知諸務奮勉協同將  
軍大臣等克蒞大事甚屬可嘉自當錫予優渥著加  
恩賞給郡王品級先是軍所劾霍集斯議烏什賦謂  
舊例計畝徵什一別無他貢額憾阿克蘇伯克鄂  
對議事輒不協善阿什默特乞司和闐六城伯克  
務葉爾羌諸城頭目私饋受不辭知吐魯番扎

薩克額敏和卓封郡王爵故以伯克稱之疏至  
諭兆惠富德等曰霍集斯或不過恃功率意即暫示  
容如情形叵測亦不得姑息從事霍集斯自巴達克  
山還請從凱師入朝約兆惠等待阿克蘇赴烏什  
倣裝如期會以第三子托克托索丕從時伯克等  
四十四人兆惠令霍集斯偕哈密扎薩克貝勒玉  
素卜領之舒赫德等導

旨將遣霍集斯等赴

京

諭曰前霍集斯葉爾羌被圍時殊為勞苦往巴達克山亦頗効力但仍令其居於舊地究屬未便俟伊到京時再酌量從優安置伊子漠咱帕爾啟程亦不必照厄魯特宰桑之例仍與前次入覲一體辦理舒赫德等當善為慰遣至伊等起程後所查霍集斯家口不妨明白曉示以霍集斯蒙恩旨留京來取家屬團聚務宜供給饒裕加意照看蓋伊等非獲罪之人籍沒

家產者可比所有積蓄俱一同辦送仍約束兵丁回人毋許妄行偷竊其田園房屋亦應變價給賞以資生計二十五年以烏什諸伯克許霍集斯父子虐衆諭曰烏什回人等許告霍集斯父子苦虐部衆經辦事大臣等具奏朕以霍集斯抒誠効力所有過失皆從前陋習若遽行治罪心有不忍但仍令其管轄所屬則上下猜忌不能相安無事即如準噶爾人等亦因聚斂成讐上既凌虐下亦忿恨互相侵噬以底滅亡

可為明鑒因將霍集斯父子優其廩祿安置京師而  
各城頭目亦自知所懲創悛改舊習恐愚頑無識之  
徒因此遂長刁風撫拾已往之事公行訐告或伊什  
幹等圖得阿奇木之缺或所屬人等妄生事端挾制  
總管大干法紀嗣後有似此者非但不行辦理仍究  
明情節重治其罪斷不寬宥爾等知此惟期上下相  
安勤於事業勉為良善永享昇平霍集斯至

召覲於

正大光明殿

齎章服飲至豐澤園

賜銀幣伯克等將歸

詔宣示烏什訐霍集斯狀霍集斯奏烏什怨臣甚臣蒙  
恩釋罪請留居

京師

慰允之

諭曰霍集斯懇請留京意殊誠切着照所請厚為資給

安置京師但其先世墳墓遠隔故鄉著加恩將伊幼子托克托索丕遣回阿克蘇以供祭掃其烏什所有田產即行變價在阿克蘇置業賞給托克托索丕承管著舒赫德等遵照辦理仍傳諭該處回衆俾咸知朕意

詔圖形

紫光閣

御製贊曰奉元戎檄擒達瓦齊後稍觀望旋迎我師同大軍進被圍黑水回部望族居之京邸時輔國公和

什克額色尹一等台吉瑪木特圖爾都哈什木二  
等台吉阿卜都爾瑞三等台吉帕爾薩等先後入

覲

詔留京師統隸蒙古正白旗視應得俸銀給祿米資贍  
霍集斯疏列和闐戶產及吐魯番舊屬

詔給托克托索丕會漠咱帕爾行次沙泉子疾  
詔醫視俟痊乃就道復

命霍集斯寄之書令善自攝疾痊偕呼岱巴爾氏至



詔與其父聚處尋額敏都霍什提卜逮至

上以霍集斯戚族

詔免死給廣東福建駐防兵秋霍集斯偕輔國公和什

克扈

蹕木蘭行圍蒙古扎薩克等進

宴陳詐馬什榜教馳諸戲

詔霍集斯列觀

旋蹕避暑山莊

命觀燈火預萬樹園宴冬

詔預朝正外藩蒙古回部王公伯克等宴嗣扈

蹕侍

禁預內王公大臣班三十年烏什逆回齊哈木圖拉等

糾衆叛霍集斯遵

旨列戚族居烏什者以

聞

詔錄示伊犁將軍明瑞俟克烏什察霍集斯族被脅者

勿努戮四十六年卒子四長漢咱帕爾封公品級後以罪削授一等侍衛次呼岱巴爾氏授內大臣次托克托索丕居阿克蘇次哈第爾襲郡王爵

一次襲哈第爾霍集斯第四子乾隆四十六年襲郡王品級多羅貝勒四十八年理藩院議哈第爾隸內蒙古旗與外藩扎薩克不同請視內旗例俟出缺時遞降至公爵乃世襲罔替

詔如議



欽定外藩蒙古回部王公表傳卷之一百十六

欽定四庫全書

欽定外藩蒙古回部王公表傳卷之一百十七

傳一百一

輔國公和什克列傳

居京師之回鹘

和什克和闐人初為喀什噶爾阿奇木伯克隸準噶爾大軍既定準噶爾遣布拉呢敦自伊犁歸和什克偕諸伯克不納聞我軍至乃迎入布拉呢敦尋偕弟霍集占謀逆和什克避走布魯特依阿特

巴什鄂拓克長明依勒哈乾隆二十三年霍集占  
抗大軍於喀喇烏蘇侍衛布占泰徵兵布魯特抵  
明伊勒哈牧示軍檄辭不即應二十四年大軍破喀  
喇烏蘇圍布占泰復赴布魯特和什克乃偕明伊  
勒哈至阿克蘇謁定邊將軍兆惠請降兆惠詰進  
兵道和什克曰霍集占昆弟善霍罕額爾德尼伯  
克大軍迫將竄往喀什噶爾西歧道三請先據之  
兆惠因檄霍罕勿助逆時定邊右副將軍富德屯

和聞兆惠議分道進兵一由阿克蘇攻喀什噶爾  
一由和闐攻葉爾羌和什克復繪圖告曰喀什噶  
爾西由鄂坡勒達霍罕敏珠爾嶺由玉斯圖阿喇  
圖什達安集延額德格訥諸部請示檄防賊竄兆  
惠悉如言進兵喀什噶爾以和什克導霍集占等  
棄城竄葉爾羌喀什噶爾定兆惠請以和什克署  
葉爾羌阿奇木伯克其叔父素賚璫舊為葉爾羌  
商伯克請仍職



允之二十五年和什克入

觀

詔留京師封輔國公

賜雙眼孔雀翎和什克疏列和闐哈喇哈什葉爾羌沙

古則里諸邑屬產

詔易值留和闐贍其戚屬四十六年卒子伊巴喇伊木

襲

一次襲伊巴喇伊木和什克長子乾隆四十六年

襲輔國公四十八年

詔視出缺時視有績令子如爵無績以次降襲三等台

吉五十三年

詔世襲輔國公罔替

輔國公額色尹列傳

居京師之回爵  
定世襲三等台吉

額色尹葉爾羌人號額爾克和卓其始祖曰派罕

帕爾世為回部長居葉爾羌領其族族統稱和卓

猶蒙古族統稱台吉也準噶爾強策妄阿喇布坦

侵葉爾羌黠和卓阿哈瑪特掠其族置吐魯番尋以吐魯番內附復脅徙伊犁大軍定準噶爾額色尹等將乞降阿哈瑪特子霍集占復乘阿睦爾撒納亂脅族自伊犁歸葉爾羌額色尹不從避徙布嚕特霍罕瑪爾噶朗安集延納木干塔什干諸部弟帕爾薩及兄子瑪木特圖爾都從之霍集占與布嚕特仇以兵索之不得乾隆二十三年大軍討霍集占抵葉爾羌額色尹聞之偕圖爾都及布嚕特之

呼什齊鄂拓克長納喇巴圖以兵攻喀什噶爾襲  
英吉沙爾諸邑時霍集占抗大軍於喀什噶爾蘇哈  
密扎薩克貝子玉素卜遣侍衛布占泰徵兵布魯  
特抵阿特巴什其長曰明伊勒哈以兵寡辭布占  
泰歸謀霍集占兄布拉呢敦自喀什噶爾援葉爾  
羌聞布魯特兵襲其邑疑與我軍應懼不敢逼喀  
喇烏蘇圍則未知其為布魯特何鄂拓克也二十  
四年橋木特自布魯特赴阿克蘇謁定邊將軍兆

惠以故告且稱額色尹集兵納喇巴圖待我軍檄  
兆惠傳

旨獎給幣令禡木特達額色尹書額色尹以兵至道遇  
賊百餘擊之獲燾一獻軍門請內附兆惠慰諭之  
霍集占等既竄有布魯特兵攻喀什噶爾之布喇  
村額色尹亟遣屬從侍衛成果檄阻之曰葉爾羌  
喀什噶爾已定若復進兵是抗大軍也布魯特兵  
乃還兆惠遣額色尹入

覲

上以其為派罕帕爾裔

詔封輔國公額色尹奏世居葉爾羌準噶爾掠赴吐魯  
番再徙伊犁以避霍集占亂奔布魯特幸為

天朝臣僕安置惟

命

詔留京師傳

諭兆惠等曰額色尹等係霍集占族且居伊犁久不便

遣歸葉爾羌仍將伊等家口送京四十八年

詔俟出缺後子如爵視有績再傳仍襲公爵無績以次

降襲三等台吉

輔國公圖爾都列傳

居京師之回爵  
定世襲三等台吉

圖爾都葉爾羌人輔國公額色尹從子初徙居伊

犁以不附族酋霍集占叛從額色尹走匿布魯特

境布魯特稱曰和卓乾隆二十三年聞大軍征霍

集占抵葉爾羌霍集占抗諸喀喇烏蘇陰以布魯

特兵從額色尹攻喀什噶爾分賊勢二十四年其兄禡木特謁大軍告故圖爾都尋自布魯特至請降額色尹偕禡木特先入

覲圖爾都繼至

上以其為派罕帕爾裔

詔授扎薩克一等台吉留

京師二十七年追論攻喀什噶爾功晉封輔國公四十四年卒子託克託襲



一次襲託克託圖爾都長子乾隆四十四年襲輔  
國公四十八年

詔示出缺後視有績令子如爵無績以次降襲三等台

吉

扎薩克一等台吉禡木特列傳

居京師之四爵  
定世襲二等台吉

禡木特葉爾羌人輔國公額色尹從子初號鄂托蘭  
珠和卓以不附族首霍集占叛偕弟圖爾都從額色  
尹走匿布魯特境乾隆二十三年大軍征霍集占

抵葉爾羌霍集占抗諸喀喇烏蘇額色尹圖爾都  
以兵攻喀什噶爾禡木特留布魯特視戚屬二十  
四年額色尹復自布魯特集兵遣禡木特赴阿克  
蘇謁定邊將軍兆惠告故且稱以避霍集占走布  
魯特不獲早至兆惠慰諭之進兵喀什噶爾攜禡  
木特從令以書達額色尹額色尹馳至喀什噶爾  
諸城定兆惠遣禡木特入

覲

上以其為派罕帕爾裔

詔授扎薩克一等台吉留

京師復

諭兆惠遣其子巴巴至與聚處四十四年卒子巴巴降襲

二等台吉

一次襲巴巴禡木特長子初稱和卓乾隆二十四

年兆惠遵

旨自軍所遣至

詔授四等台吉四十四年襲二等台吉四十八年

詔俟出缺時視有績令子如爵無績以次降襲四等台

吉五十三年

詔世襲二等台吉罔替

一等台吉哈什木列傳

居京師之回爵  
定世襲二等台吉

哈什木吐魯番人姓博爾濟吉特為元太祖裔初

元太祖定西北諸部分遣王駙馬等領之次子察

哈岱居伊犁兼轄吐魯番回衆越十傳至特木爾

圖呼魯克素蒙古俗習回教子吉匝爾和卓布哈爾拜密爾徙居吐魯番不復有伊犁地

本朝康熙二十五年有阿布勒穆咱帕爾蘇勒檀瑪哈瑪特額敏巴圖爾哈什汗者自吐魯番貢稱元裔見吐魯番回部總傳五十九年大軍討準噶爾由吐魯番進擊烏嚕木齊哈什木兄莽蘇爾迎獻駝馬軍還策妄阿喇布坦罪之禁諸喀喇沙爾乾隆二十年大軍定準噶爾莽蘇爾聞之乞降定北將

軍班第奏請遣轄吐魯番舊屬未定議而阿睦爾  
撒納叛莽蘇爾等不獲歸吐魯番二十四年葉爾  
羌諸回城定乃獲莽蘇爾及哈什木二十五年入

覲

上以其為元太祖裔

詔並授一等台吉留

京師三十年哈什木卒子阿布勒降襲二等台吉莽  
蘇爾以無嗣停襲故不立傳

一次襲阿布勒哈什木長子乾隆三十年襲二等

台吉四十八年

詔俟出缺後視有績令子如爵無績以次降襲四等台

吉五十三年

詔世襲二等台吉罔替

二等台吉阿卜都爾璘列傳

居京師之回爵定世襲三等台吉

阿卜都爾璘葉爾羌人派罕帕爾裔初葉爾羌和

卓曰阿哈瑪特策妄阿喇布坦黜之阿哈瑪特死

復禁其子布拉呢敦霍集占葉爾羌喀什噶爾衆  
別立長號伊克和卓即阿卜都爾璘祖也乾隆二  
十年大軍定準噶爾釋布拉呢敦歸葉爾羌伊克  
和卓不即納聞我軍至乃迎入已而霍集占萌叛  
志偕布拉呢敦分據葉爾羌喀什噶爾城戕伊克  
和卓阿卜都爾璘避走布魯特霍集占捕禁之二  
十四年大軍定葉爾羌獲阿卜都爾璘二十五年  
入



觀

上以其為舊和卓孫

詔授二等台吉留

京師三十七年卒子阿卜都呢咱爾降襲三等台吉

一次襲阿卜都呢咱爾阿卜都爾瑞長子乾隆三

十七年襲三等台吉四十八年

詔俟出缺後視有績令子如爵無績降襲四等台吉五

十三年

詔世襲三等台吉罔替

三等台吉帕爾薩列傳

居京師之四爵

帕爾薩葉爾羌人輔國公額色尹弟  
以不附族酋霍集占叛從額色尹走匿布魯特境  
布魯特稱曰和卓乾隆二十四年大軍定霍集占  
亂額色尹自布魯特來降帕爾薩不即至定邊將  
軍兆惠遣侍衛達克塔納招降霍罕瑪爾噶朗安集  
延納木干諸部復齎軍檄索帕爾薩帕爾薩居瑪

爾噶朗城從我使至請內附二十五年入

覲

上以其為派罕帕爾裔

詔授三等台吉留

京師四十八年

詔侯出缺後視有績令子如爵無績降襲四等台吉五

十三年

詔世襲三等台吉罔替



欽定外藩蒙古回部王公表傳卷之一百十七

欽定四庫全書

欽定外藩蒙古回部王公表傳卷之一百十八

傳第一百二

原封貝勒品級固山貝子鄂對列傳

居新疆之回  
爵今襲散秩

大臣晉固  
山貝子

鄂對庫車人祖瑪爾咱尼默特父頗喇特世居庫  
車鄂對嗣準噶爾脅徙伊犁居河北固勒扎乾隆  
二十年大軍定準噶爾鄂對乞降二十二年從定

邊將軍喀爾喀親王成衮扎布勒厄魯特孽賊二  
十三年靖逆將軍雅爾哈善討逆回布拉呢敦霍  
集占鄂對請從

獎授散秩大臣

賜孔雀翎時逆黨阿卜都克勒木為庫車阿奇木伯克  
鄂對戚屬殲焉大軍抵庫車鄂對以世居悉形勝  
告副都統順德訥兵據城外林賊至不敢爭開城  
旬餘鄂對告雅爾哈善曰庫車城固甚請設雲梯

絕水道困之且將必有援至城東南達庫爾勒喀  
喇沙爾路可無虞北達賽哩木有沙勒達朗鄂斯  
伯克什二隘遣健卒塞以石賊必不能至西達沙  
雅爾有鄂根河水盛可行舟至東由雅哈托和爾  
托木羅克達賽哩木諸城請兵備雅爾哈善遣防  
各隘阿卜都克勒木弟阿卜都哈里克挈賊二千  
餘襲托木羅克路擊敗之

諭曰鄂對熟悉要隘預籌防範現在有攻克回城可即



授為伯克復以霍集占擒賊二千餘自鄂根河抵庫  
車為我軍所敗

詔賜鄂對銀幣及子鄂斯璘時霍集占已入庫車我軍  
不之知翌日賊開門出抗鄂對請以兵屯鄂根河  
遏竄路雅爾哈善不設備霍集占逸乃克庫車鄂  
對以子鄂斯璘偕伊勒噶爾伯克等理庫車務領  
沙雅爾自率兵赴阿克蘇定邊將軍兆惠代雅爾  
哈善察鄂對可任事疏請授阿克蘇阿奇木伯克

以舊伯克頗拉特巴巴克等佐之兆惠尋進兵葉爾羌遣鄂對偕侍衛噶布舒齊凌扎卜等赴和闐六城抵額里齊伯克等以城獻撫其衆哈喇哈什玉隴哈什塔克齊爾拉克爾雅諸城聞之皆降鄂對令諸伯克使奉書赴葉爾羌軍自以書達阿克蘇其妻居阿克蘇城輸布及裘助駐防兵

詔授鄂對內大臣而霍集占以賊衆抗大軍於喀喇烏蘇和闐軍書再不達鄂對將往援偵賊襲和闐遣

使馳告阿克蘇叅贊大臣舒赫德集諸路兵分援喀喇烏蘇和闐鄂對妻以馬百助軍鄂對復自和闐集兵千備羊及糗為禦賊計

諭曰鄂對自隨軍以來諸事奮勉此次尤徵誠悃著加恩賞給公品級既而賊黨阿卜都克喇木等往來額里齊哈喇哈什間鄂對檄伯克等固拒書六城伯克名及戶畜數達阿克蘇援兵至遣赴諸城賊復布偽檄脅衆鄂對再遣使告阿克蘇以兵寡遣卒

二百往援鄂對妻偕伯克等令屬五十人齎糧從  
鄂對檄諸城曰大兵將至可固待明年春大軍破  
喀喇烏蘇圍副都統巴圖濟爾噶勒等以兵九百  
援和闐鄂對啟額里齊城迎赴哈喇哈什擊賊於  
博羅齊敗之諸城傳檄定遣其妻兄阿璠伯克馳告  
阿克蘇會定邊左副將軍富德至鄂對遣從子阿  
卜都爾璠攜六城伯克遠迎掠

聞

嘉固守和聞功

詔封輔國公遣歸阿克蘇授阿卜都爾瑞三等侍衛時  
議兆惠富德軍分道進

諭曰鄂對効力軍前已將二載自當稍為休息聞伊行  
裝為賊所掠甚可軫念著賞銀二百兩令其在阿克  
蘇辦事伊若情願出兵求請誠切即同伊前往亦可  
仍當加意體恤

命甫下兆惠奏鄂對固請從軍

詔倍給裝資布拉呢敦霍集占聞大軍至皆竄鄂對抵  
喀什噶爾馳會富德軍擊之敗諸阿爾楚爾賊遁  
伊西洱庫爾官軍分隊擊鄂對偕和闐伯克霍集  
斯等執肅呼降賊黨萬餘趨請命布拉呢敦霍集  
占遁巴達克山富德遣鄂對攜降衆歸喀什噶爾  
諭嘉其奮勇勦賊晉封固山貝子巴達克山獻霍集占首  
俘逆屬有薩喀勒索丕者其妻為阿卜都爾瑞女  
弟

詔給鄂對尋

諭從凱師入

覲晉封貝勒品級二十五年春至

召覲於

正大光明殿

賜章服飲至豐澤園

賚銀幣

詔圖形

紫光閣

御製贊曰平伊犁時歸順勤王回部傑出其心允良往  
諭和闐被圍三月共嚙布舒全守卓越時阿克蘇伊  
什幹伯克頗拉特覬阿奇木伯克慫回衆薦已許  
鄂對舒赫德斥之疏

聞

諭曰回人猜忌擠排乃其舊習自當嚴為杜絕鄂對果  
不勝任亦不當因頗拉特之言遽行斥革且鄂對即



因此獲咎而頗拉特藉端聳衆希圖代任之罪亦應  
察究斷無墮其譴計竟授為阿奇木之里復以阿克  
蘇許鄂對若歸令仍舊職將不安

詔調葉爾羌阿奇木伯克鄂對抵葉爾羌伊什幹伯克  
阿卜都喇伊木等許嗜飲且躁妄不稱職狀首列

阿琿名

詔曉示各城回人諸事嗣聽阿奇木伯克理阿琿勿妄  
預辦事都統新柱疏鄂對及阿卜都喇伊木隙若

互忌恐誤公

論曰回人性多疑懼若為之隱覆恐伊等更覺不安朕  
意竟將伊等傳集衆前分別是非加以訓飭庶鄂對  
不致猜疑阿卜都喇伊木亦不妄行防備悔悟之後  
和衷共事自無掣肘之虞阿卜都喇伊木以不獲為  
阿奇木伯克私與霍罕額爾德尼伯克謀逆事覺  
論誅二十六年

論曰前因回人舊習凡伯克等多腹削所屬是以賞給

各城阿奇木伯克等錢帛地畝及供役之人俾得奉  
公自愛近聞葉爾羌伯克鄂對喀什噶爾伯克噶岱  
默特等頗知守分無苛擾回人之事深屬可嘉念伊  
等歸誠日久著於官給六百騰格外再加二百以示  
鼓勵此次係出自特恩不可視以為例四十年

諭曰貝勒品級鄂對公品級噶岱默特均於未得回地  
以前歸誠伊犁且在軍營著有勞績自與恩封者不  
同均令世襲罔替四十三年鄂對卒

詔其子鄂斯瑞襲貝勒品級

賞雙眼孔雀翎時鄂斯瑞任阿克蘇阿奇木伯克葉爾羌辦事侍郎高樸請令繼鄂對為葉爾羌阿奇木伯克

上不允

詔鄂斯瑞調任喀什噶爾以喀什噶爾伯克色提卜阿勒氏調任葉爾羌烏什辦事三品大臣永貴尋疏色提卜阿勒氏訐高樸擾虐回民私售官玉狀

詔訊得實予辟

諭曰今年三月鄂對病故高樸即奏請以鄂對之子鄂斯瑞接辦該處阿奇木伯克事朕以為若如此父子相繼辦事竟似葉爾羌之阿奇木為伊家世職久之與唐時藩鎮何異因將色提卜阿勒氏調至該處以鄂斯瑞赴喀什噶爾意在回部伯克防微杜漸若照高樸之奏令鄂斯瑞在彼為阿奇木伯克鄂斯瑞知其父與高樸相好有碍顏面且伊年輕未能更事必順從

高樸所為扶同徇隱不能如色提卜阿勒氏之和盤托出矣復以鄂對比高樸罪褫世爵

諭曰鄂對前以軍營効力加恩賞給貝勒品級授為葉爾羌阿奇木伯克自當感激朕恩一切事務實心奮勉以圖報効即令高樸意欲騷擾回民並欲盜買玉石伊當勸止或如色提卜阿勒氏首告始為報朕恩施乃竟引誘高樸給予黃金五十兩并玉石二千餘斤令在內地販賣則伊從前早有騷擾回民盜取玉

石情事若不嚴加懲創朕如何尚用伯克耶倘伊尚在即當正法今雖病故自應削去貝勒品級以示懲儆伊子鄂斯滿現襲貝勒品級著傳旨永貴即行削去但鄂斯瑞并非隨同伊父居住此等情事與伊無涉著加恩授為散秩大臣仍留喀什噶爾阿奇木伯克之任既革去貝勒自不便令戴兩眼孔雀翎著賞給一眼孔雀翎

一次襲鄂斯瑞鄂對長子乾隆二十三年授庫車阿奇木伯克二十四年叅贊大臣舒赫德疏鄂斯

瑞敏練

詔授三品

賞孔雀翎尋侍衛齊凌扎卜以兵護多倫回衆徙玉古爾庫爾勒鄂斯瑞備糗糧令速就道

嘉其急公

詔如數給值二十五年從鄂對入

覲

賜銀幣歸庫車議偕沙雅爾賽哩木拜城諸伯克備糧



四萬餘助赴伊犁屯田回民

詔獎賚三十年聞烏什叛收庫車軍械藏諸家復馳兵

勦

嘉賞二品頂帶大軍團烏什諸路兵分隊擊賊鄂斯瑞

著俘斬績

詔獎賜幣三十三年來朝

命乾清門行走三十四年授二等台吉四十年授阿克

蘇阿奇木伯克四十三年襲貝勒品級固山貝子

調喀什噶爾阿奇木伯克尋追論鄂對比高樸罪  
詔削世爵授散秩大臣四十八年

諭曰鄂斯璘之父鄂對前在軍營出力朕即加恩封貝  
勒品級後因高樸案內革去貝勒仍加恩賞給鄂斯  
璘散秩大臣若俟出缺後即令停止不准承襲朕心  
實為不忍所有鄂斯璘散秩大臣著加恩俾予世襲  
罔替先是巴達克山獻布拉呢敦逆子三曰和卓阿  
斯瑪曰阿卜都哈里克曰和卓巴哈敦有薩木薩克者

為布拉呢敦幼子竄安集延

上憫其無知

詔免捕誅比長窮不得食四十九年陰遣人至喀什噶爾巧財物布嚕特散秩大臣阿其睦弟額穆爾等私與通鄂斯瑞聞之首諸喀什噶爾辦事大臣保成阿其睦懼其弟獲重罪誣鄂斯瑞與同謀

詔械阿其睦等至京訊得實

諭曰阿奇木伯克鄂斯瑞感激朕恩於薩木薩克與

回衆潛通音信之事毫無隱諱一經得信即報知保  
成隨同實心查辦始終奮勉甚屬可嘉著加恩晉封  
固山貝子以示獎勵五十二年冬來朝五十三年正  
月卒京邸

諭曰阿奇木伯克貝子鄂斯璫厯年輸誠宣力感戴朕  
恩實心盡職正資倚任今來京入覲遽爾寢疾朕遣  
御前侍衛帶領太醫院官往視醫治不痊忽聞溘逝深  
為憫惻著遣御前侍衛豐紳濟倫往奠仍賞銀五百

兩令辦理喪事復

諭曰鄂斯瑞所遺散秩大臣世爵即施恩令伊子邁哈默特鄂三承襲至固山貝子爵係朕特恩賞給雖非世襲但鄂斯瑞効力年久所有固山貝子爵亦施恩令伊子邁哈默特鄂三承襲以示朕撫恤回僕之至意

三次襲邁哈默特鄂三鄂斯瑞長子乾隆五十三年襲散秩大臣

特恩兼襲固山貝子

欽定外藩蒙古回部王公表傳卷之一百十八

欽定四庫全書

欽定外藩蒙古回部王公表傳卷之一百十九

傳第一百三

貝子品級輔國公色提卜阿勒氏列傳

居新疆之回爵

色提卜阿勒氏烏什人祖和卓木呼里父齊里克  
舊為拜城伯克色提卜阿勒氏嗣以準噶爾脅徙  
攜弟阿克伯克赴伊犁乾隆二十年大軍定準噶  
爾色提卜阿勒氏乞降尋阿睦爾撒納叛擾伊犁



色提卜阿勒氏奔巴里坤二十一年阿睦爾撒納  
走哈薩克色提卜阿勒氏復歸伊犁定邊右副將  
軍兆惠遣偵副都統阿敏道招降回衆狀將抵庫  
車謀逆賊布拉呢敦霍集占誘執阿敏道馳歸迎  
告兆惠軍於濟爾阿朗道遇嗎哈沁奮擊之復從勦  
厄魯特叛賊呢瑪等抵鄂壘扎勒圖賊遮道侍衛  
圖倫楚以援至破圍抵巴里坤

詔授四品

賞孔雀翎二十二年從定邊將軍成衮扎布勦厄魯特  
孽賊二十三年靖逆將軍雅爾哈善討布拉呢敦  
霍集占色提卜阿勒氏請從

獎授三品總管抵庫車霍集占以賊五千餘來援擊敗  
之

賚銀幣庫車克復從定邊將軍兆惠由烏什阿克蘇進  
抵葉爾羌賊抗諸喀喇烏蘇二十四年定邊右副  
將軍富德等援至破圍還阿克蘇兆惠攻喀什噶爾

復以色提卜阿勒氏導布拉呢敦霍集占棄城竄  
富德等追勦色提卜阿勒氏駐英吉沙爾濟軍糧  
詔授英吉沙爾阿奇木伯克二十五年調阿克蘇阿奇  
木伯克會喀什噶爾伯克邁喇木呢雅斯等叛掠  
庫勒塔里木諸汛色提卜阿勒氏自英吉沙爾聞  
之以伯什克勒木派蘇巴特為賊巢偕提督楊寧  
往勦擒斬賊黨

諭曰色提卜阿勒氏前從兆惠進兵甚屬勤慎此次著

有勞績著加恩授散秩大臣尋

賜二品頂帶時英吉沙爾阿奇木伯克索勒屯和卓入  
覲以色提卜阿勒氏代喀什噶爾辦事大臣海明復遣  
理派蘇巴特阿奇木伯克務以其弟阿克伯克代  
理英吉沙爾二十六年色提卜阿勒氏抵阿克蘇  
助赴伊犁屯田回民畜物

命獎賚之海明復疏色提卜阿勒氏議本年雨澤應時  
收穫豐裕但回人不知撙節請令歲納穀五百石

貯倉備賑俟積五千石停收從之二十七年色提  
卜阿勒氏以世居烏什遣屬視祖父塋請給烏什  
入官田產以阿克蘇私業償

諭曰色提卜阿勒氏前在軍營頗屬奮勉已加恩授為  
散秩大臣阿奇木伯克奉職亦屬盡心今以先塋之  
故請派數戶遣往守視自宜允行所有給與田產著  
加恩賞賜不必由阿克蘇抵交二十八年

諭曰阿克蘇阿奇木伯克散秩大臣色提卜阿勒氏前

隨兆惠出兵曾經奮勇効力著加恩賞給公品級以示酬庸之典二十九年來朝

詔封輔國公

賜貂裘三十年烏什逆回賚哈木圖拉等叛

詔色提卜阿勒氏歸理軍務抵烏什伊犁將軍明瑞督兵至遣歸阿克蘇以糗糧及火藥鉛丸解軍賚哈木圖拉之叛也以烏什阿奇木伯克阿卜都拉不善撫衆故烏什既定明瑞奏葉爾羌喀什噶爾阿

克蘇諸伯克等皆不協物議惟鄂對材可用請以  
阿克蘇伯克色提卜阿勒氏調和闡喀什噶爾伯  
克噶岱默特調阿克蘇鄂對令仍任葉爾羌事

諭曰伯克等皆歸順舊人且遇有事務頗能出力報効  
此次若盡行移調則回人布魯特等不知情事妄生  
猜疑謂國家乘新取烏什之威將伊等移調若謂伊  
等貪圖小利亦回人常事安能保其必無惟在大臣  
等正已率屬賞罰嚴明地方自必安靜毋庸更調紛

紘轉滋惶惑即如所奏亦未有確實欺跡不過得之物議又安可盡信乎明年築烏什新城徙駐阿克蘇兵色提卜阿勒氏視役三十二年工竣

嘉其勤事

賜雙眼孔雀翎三十五年來朝

命乾清門行走四十年授喀什噶爾阿奇木伯克四十年葉爾羌辦事侍郎高樸以葉爾羌阿奇木伯克鄂對卒請令其子鄂斯璫繼



上不允

詔以色提卜阿勒氏為葉爾羌阿奇木伯克以鄂斯瑞  
為喀什噶爾阿奇木伯克色提卜阿勒氏抵葉爾  
羌察知高樸盜採官玉出售並聽鄂對及伊什幹  
伯克阿布都舒庫爾等懇懇附和狀首之喀什噶  
爾辦事大臣永貴疏

聞

詔抵罪以色提卜阿勒氏能據實控告晉封貝子品級

其長子邁默特阿卜都拉授二等台吉

賜孔雀翎並傳密爾岱山採玉交色提卜阿勒氏管理  
以絕滋擾五十三年

詔世襲罔替尋卒

諭曰色提卜阿勒氏實心効力辦理一切感激朕恩宣  
力有年昨據塔奇奏伊患病朕即賜藥以冀速痊茲  
聞溘逝深為憫惻著加恩賞銀五百兩治喪所遺貝  
子品級公爵即令伊子邁默特阿卜都拉承襲

一次襲邁默特阿卜都拉色提卜阿勒氏長子乾隆五十三年襲貝子品級輔國公授阿克蘇阿奇木伯克

欽定外藩蒙古回部王公表傳卷之一百十九

欽定四庫全書

欽定外藩蒙古回部王公表傳卷之一百二十

傳第一百四

公品級噶岱默特列傳

居新疆之回爵

噶岱默特烏什人初為拜城阿奇木伯克隸準噶爾乾隆二十一年聞大軍定準噶爾棄拜城來歸道遇逆賊阿睦爾撒納使脅附不從間道至伊犁以告二十二年從定邊將軍成衮扎布勦厄魯特

孽賊二十三年靖逆將軍雅爾哈善討逆回布拉  
呢敦霍集占噶岱默特請從

獎授三品總管

賜孔雀翎抵庫車霍集占以賊五千來援擊敗之

賚銀幣庫車克從赴阿克蘇烏什抵葉爾羌定邊將軍

兆惠遣偕副都統愛隆阿屯喀什噶爾路防賊援

霍集占以兵驟至抗兆惠軍於喀喇烏蘇噶岱默

特等欲破圍入不得歸阿克蘇偕辦事大臣舒赫

德議集兵援和闐復告急噶岱默特曰賊困我軍和  
闐諸城驚懼不以兵拯恐滋變舒赫德遣兵五百  
赴和闐以二千援喀喇烏蘇噶岱默特攜阿克蘇  
伯克等列前隊沿途回衆曰爾等或早悔罪身  
及家無慮也否必就滅以故無梗道者明年喀喇  
烏蘇圍破

詔擢一等侍衛尋授拜城伯克復從大軍征葉爾羌霍  
集占等棄城竄尾擊之敗諸阿爾楚爾及伊西洱庫

爾

詔封公品級明年來朝

召覲於

正大光明殿

賜章服飲至豐澤園

賚銀幣行有期

召宴之

溫諭遣歸

詔授喀什噶爾阿奇木伯克有阿卜都喇伊木者霍集  
占逆屬也初為喀什噶爾阿奇木伯克聞大軍至  
請降

旨宥從逆罪授葉爾羌伊什幹伯克至是偕噶岱默特  
等入

覲旋派蘇巴特伯克呢雅斯喀什噶爾商伯克邁喇木  
等謀逆布偽檄達葉爾羌約為應阿卜都喇伊木  
懼首之噶岱默特語叅贊大臣舒赫德曰阿卜都



喇伊木等聞賊倡亂不無疑懼請防之舒赫德以聞時叛賊呢雅斯等就擒阿卜都喇伊木族無附逆者諭曰噶岱默特心有所疑即行告稟具見惻誠但阿卜都喇伊木等係初次入覲轉回之人且邁喇木等黨與內並無伊子弟名目若以曾經霍集占委用遂懼其反覆則恐於伊等不無屈抑而回衆更生疑懼著舒赫德密諭噶岱默特以天朝法度惟顯犯罪惡始行懲治從不無故猜疑致有屈抑但爾誠意可嘉恩旨深

為獎許并明白曉示阿卜都喇伊木云爾等係入覲之人不但未知賊匪倡亂之事即子弟等亦全無附和者皇上已洞鑒情形與爾等無涉嗣後惟當矢心報効以期永承恩澤曉示後仍令照舊辦事二十六年以噶岱默特及葉爾羌阿奇木伯克鄂對無侵漁回人習

詔增養廉示獎二十七年噶岱默特倡議偕諸伯克輸穀千石貯城邑贍貧戶復助材建兵屋三百楹

命獎賚二十八年喀什噶爾辦事左都御史永貴疏言  
噶岱默特告回部田畝資溝渠利喀什噶河曰赫  
色勒河出喀什噶爾西喀什噶山溉東南托果斯  
遷賽爾瑞喀什噶爾哈喇克爾多羅特巴克阿爾  
巴特派蘇巴特諸邑過巴爾楚克滙羅卜諾爾曰  
托庸河出喀什噶爾西北托庸山溉東南玉斯圖  
阿喇圖什阿爾琥呼爾罕阿斯圖阿喇圖什伯什克呼  
木諸邑與赫色勒河合流曰圖巴里克河出喀什

噶爾西南吉斯嶺及西界烏帕勒山上流向東溉  
汗阿哩克塔斯琿赫色勒布伊諸邑下流向東北  
與赫色勒河合流曰庫森塔斯琿河出喀什噶爾  
西南英吉沙爾城西羌琿山溉東北英吉沙爾諸  
邑散流入沙磧惟赫色勒布伊塔斯琿汗阿哩克  
三邑分引圖巴里克河水不給用臣偕噶岱默特  
往視自赫色勒河東南浚渠四十餘里引水入赫  
色勒布伊又視托庸河水湍急田畝被衝刷議建

土石堤壩並鑿山石以弱水勢報

聞先是布魯特額德格訥鄂拓克長阿濟拜以霍罕額爾德尼伯克掠其邑憾之聞霍集雅特之丕色勒伯克與構難因潛兵襲霍罕使至葉爾羌掠布魯特樵者十人告梗道噶岱默特察辭誣詰之會丕色勒伯克與額爾德尼伯克釋怨阿濟拜懼請檄霍罕勿侵已永貴偕噶岱默特責罪均令各安處未幾額爾德尼伯克以布魯特薩妻鄂拓克長

沙巴圖掠市馬告噶岱默特索所掠歸霍罕霍罕  
復侵額德格訥奪鄂斯邑永貴責霍罕罪霍罕詭  
稱鄂斯為已舊屬不即歸額德格訥時阿木都喇  
伊木為喀什噶爾伊什幹伯克以不獲為阿奇木  
懷逆志數通霍罕永貴等不之察遣侍衛托穆齊  
圖偕阿卜都喇伊木赴霍罕責不聽命將以軍討  
阿卜都喇伊木遣屬摩羅郭帕和卓哈勒默特告  
額爾德尼伯克曰回部和卓皆就誅惟爾存今索

侵地使不以兵從爾勿懼而迎且喀什噶爾兵寡  
爾潛至我將為應額爾德尼伯克懼市已以丕色  
勒伯克構難謝之托穆齊圖抵霍罕額爾德尼伯  
克不之迎示順逆義乃謝罪以鄂斯邑歸阿濟拜  
托穆齊圖歸不以不迎故告二十九年噶岱默特  
屬噶帕爾赴市霍罕偵得情告噶岱默特首之辦  
事大臣納世通疏

聞

詔磔誅其孥及赴霍罕使悉緣坐以噶岱默特發逆謀  
獎賜幣三十年烏什逆回賚哈木圖拉叛遣賊黨巴布  
敦等乞援霍罕抵布魯特揚稱諸城悉附逆噶岱  
默特自喀什噶爾遣屬愛特伊默特赴布魯特額  
德格訥薩爾巴噶什諸鄂拓克告自烏什外他城  
皆安堵薩爾巴噶什長車里克齊遣弟海蘭達爾  
赴軍噶岱默特索逆使車里克齊擒巴布敦獻尋  
克烏什



詔叙噶岱默特績四十年

詔世襲罔替尋卒子阿卜都喇璘襲

一次襲阿卜都喇璘噶岱默特長子乾隆二十一年從父至伊犁乞降

召入

觀二十五年

詔授拜城阿奇木伯克視英吉沙爾城伯克秩四品四十年襲公品級四十一年卒子邁瑪第敏襲

二次襲邁瑪第敏阿卜都喇瑞長子初授二等台  
吉乾隆四十一年襲公品級四十三年授拜城伊  
什幹伯克四十八年理藩院議邁瑪第敏祖噶岱  
默特以軍功封爵請仍世襲罔替

詔如議

三等輕車都尉薩里列傳

居新疆之回爵

薩里烏什人初為阿奇木伯克霍集斯屬乾隆  
二十年霍集斯奉我軍檄擒準噶爾達瓦齊設伏

烏什城外薩里秉甲從視達瓦齊至趨控馬達瓦  
齊將引弓射薩里以刀斷其弦達瓦齊子羅卜扎  
自後馳至刀擊薩里膊者三薩里傷固控之伏發  
達瓦齊及子就擒二十三年大軍討逆回布拉呢  
敦霍集占抵烏什霍集斯以城獻薩里從赴葉爾  
羌禦霍集占於喀喇烏蘇明年春隨定邊右副將  
軍富德赴和闐時和闐圍甫解衆志未定薩里傳  
檄示之令勿驚懼富德疏其功稱慎練可任事

詔授五品

賞孔雀翎尋定葉爾羌以薩里為噶雜納齊伯克二十

五年烏什伯克阿琿等訐霍集斯請以薩里代

諭曰薩里果行走奮勉應再行酌量加恩若即授為阿

奇木則奸險之徒羣以陷人奪缺為得計時議遣兵

護屯田回民赴伊犁道由阿克蘇達海努克薩里

輸馬百三十助理臺務

詔如例給值復

優賚侯有伊什幹伯克等缺補授冬葉爾羌諸城伯克  
以年班至

駕幸瀛臺跽列西華門外凡三十三人薩里居班首

上慰問之

賜尚方食

名覲於

重華宮

賜茶果翌日

御西廠幄次

詔預外藩蒙古宴

賚冠服銀幣明年春

遣歸二十七年葉爾羌辦事尚書都統新柱等偵布拉  
呢敦屬摩羅巴喇特等匿巴達克山盜布拉呢敦  
尸瘞派蘇巴特復竊育其孥遣薩里索且令巴達  
克山伯克素勒坦沙以所掠齊特喇爾邑歸博羅爾  
長沙瑚沙默特行旬有九日抵巴達克山示之檄

素勒坦沙獻摩羅巴喇特薩里攜赴派蘇巴特掘  
得逆尸復索其孥素勒坦沙獻布拉呢敦妻三曰  
珠賚哈曰巴特瑪曰額爾克揚子三曰和卓阿斯  
瑪曰阿卜都哈里克曰和卓巴哈敦

獎給幣而齊特喇爾邑素勒坦沙不即歸薩里還新柱  
等復遣往索乃悔罪以齊特喇爾給博羅爾

上念薩里奉使勞

賜三等輕車都尉復

詔給幣俟阿奇木缺出輒列名

聞會阿克蘇伊什幹伯克頗拉特以罪褫職

詔薩里代三十年烏什逆回賚哈木圖拉等叛有額敏  
者薩里弟也居烏什賊脅赴霍罕強應命宿畢德  
爾山伺偕行者寢走阿克蘇告變阿克蘇辦事副  
都統卡塔海馳兵勦薩里助馬百復倡議偕伯克  
阿卜都噶頗爾等助牛二百運糧濟軍

詔獎額敏不附逆復



